

Evelyn Ras-Yarzagaray, directora di Famia Planea

E aña aki ta celebra 45 aña di existencia



ORANJESTAD - Oficialmente fundacion Famia Planea a lansa nan luna di celebracion, segun directora di Famia Planea Sra. Evelyn Ras-Yarzagaray. Nan tin mas di 40 aña di existencia.

E aña aki dia 24 di november proximo Famia Planea lo ta cumpliendo 45 aña di existencia. Nan ta mantene hopi proyecto keto, pero awor nan kier comparti cu pueblo con tur proyecto ta andando y con tur cos ta bayendo cu e fundacion mes. “E crecimiento di prome pa awor. E innovacion cu nos a bin ta pasa den transcurso di aña nos ta sumamente contento,” e directora ta indica. Proyectonan cu ta andando ta proyectonan cu e fundacion ta duna na scolnan, cual mayoria ta na scolnan secundario, scol basico, scol

avansa, e tayernan cu Famia Planea ta treciendo padilanti.

Crecemento

E fundacion por sinti e crecimiento den e hobennan te cu awor ta mas o menos 5 mil pa aña, pero ta kere cu e suma ta subiendo. E cantidad di cliente cu ta yega na e fundacion tambe ta creciendo, segun Sra. Ras-Yarzagaray. Trahando hunto cu AZV y tur e dokternan di cas e directora di e fundacion kier a gradici nan pa nan contribucion pa asina por sigui hunto pa un otro 45 aña mas. Tambe e fundacion kier keda informa y educa nan cliente. Tur esunnan cu ta yegando na e fundacion ta hobennan, pero tambe tin esunnan cu ta existente kendenan ta e adultonan, y nan tur ta haciendo uzo di e servicio y productonan di e fundacion.

Eherce nan trabou

Pa por sigui eherce nan trabou, pa por sigui ofrece tur nan producto y servicio aki na scolnan, treciendo campaña innovativo y manera tur hende sa aña tras aña hobennan ta bira mas exigencia, e parti di tecnologia ta hunga un rol. Esaki ta nifica cu como fundacion mester keda bay e stap mas aleu pa por keda informa y educa nan segun nan deseo na e momento ey.

Pa e motibo aki fundacion Famia Planea ta lansando nan di 5 edicion di “I Love My Body.” E biaha aki nan campaña lo ta uno diferente, e directora ta indica. E diferencia di e campaña aki ta cu e fundacion no lo wanta esaki solamente pa e temporada di carnaval, sino e biaha aki nan lo bay extende I Love My Body pa aña 2016.

Kiermen informando riba e manera cu I Love My Body tin custumber di haci, segun Sra. Ras-Yarzagaray. Lo ta haciendo esaki via diferente propaganda, diferente jingle, y productonan cu ta na caminda.

Introduci documento

E periodo ey lo wordo extendi pero naturalmente e parti serio di sexualidad e fundacion kier aporta na e comunidad. Pa e motibo aki dia 24 di november proximo fundacion Famia Planea lo ta introduciendo “Sexual Declaration Right” na Papiamento. E Sexual Declaration Right ta un documento cu ta mara na e derechonan humano. “Eigenlijk nos ta treciendo esaki den un bachi nobo na Papiamento cu cooperacion di Sr. Mirto Lacle cu ta encarga cu esaki. Y tambe cu Srta. Rosabelle,” e president di fundacion a indica.

Haya fondo

Pa e fundacion por hinca tur esaki hunto y haya fondonan necesario pa asina nan por termina cu e proyecto aki, Sra. Ras-Yarzagaray a anuncia cu dia 24 di november nan lo tene nan “Celebration event.” E evento aki ta un actividad pa recauda fondo di e fundacion, di cual ta riba e fecha cu e fundacion a inicia cu nan trabou na 1970. Nan mantene e fecha aki, di cual e anochi aki lo ta uno grandi. Esunnan cu atende e evento aki lo tin e primicia di e cam-

paña nobo di I Love My Body, pero tambe lo disfruta di tur aspecto cu lo wordo entrega y duna bek na e comunidad e anochi aki. Tambe tur hende lo por disfruta di ambiente y na mes momento por relaha nan mes, incluso ta haya e oportunidad pa contribui cu e fundacion.

“Mi ta gradici comunidad y prensa cu semper ta coopera cu Famia Planea. Mi ta pidi pa boso sigui coopera cu nos pa nos por sigui brinda lo maximo na e comunidad y e hoben di Aruba,” Sra. Ras-Yarzagaray a indica. □